

Framlegg til økonomiplan 2022-2025 og budsjett 2022.

Fråsegn frå Brukarutvalet for sjukeheimane

Brukarutvalet for sjukeheimane i Vaksdal kommune drøfta budsjettdokumenta i møte 22.11.21. Pårøranderepresentantane og verneomboda vedtok slik fråsegn:

1. Manglande fokus på sjukeheimane

- Brukarutvalet registrerar at det i framlegget til økonomiplan og budsjett er tydelege ambisjonar om nytenking innanfor helse- og omsorgsektoren. Men vi er svært uroa over at det er lite fokus på sjukeheimsomsorga og behovet for trygg og god omsorg for dei som treng slik institusjonsplass. Typisk nok har også tenesteområdet endra namn frå helse- og omsorg til helse- og meistring.
- I budsjettframlegget står det også at ein skal : «*vri fokus og innsats frå institusjonsbasert omsorg til tenester i heim, og helsefremmande, førebyggjande og rehabiliterande metodar*». Brukarutvalet fryktar derfor at det blir altfor lite fokus på trygg og god omsorg for dei som treng sjukeheimstenester.
- Måla for tenesteområdet omhandlar i all hovudsak tenester utanfor institusjon. Kvalitet, utfordringar og dimensjonering av institusjonsomsorga (sjukeheimane) er svært lite omtala.
- Det er viktig med tiltak for å sikre at dei eldre kan få bu heime lengst muleg. Men før eller seinare vil svært mange av dei få behov for institusjonsplass, særleg ettersom levealdren stadig aukar.

2. Kor blir det av velferdsteknologien?

Vaksdal kommune har i fleire år uttrykt ambisjonar om satsing på velferdsteknologi. Brukarutvalet meiner det no er tid for å etterlyse meir resultat av denne satsinga, utover heilt enkle og sjølvsegte løysingar.

3. Budsjettrammer

- Rekneskapen for helse- og omsorg for 2020 viste eit forbruk på 137,9 mill. kroner.
- Budsjettramma for 2022 er på 130,9 mill. kroner.
Men – no er også helsestasjon, jordmor og kommunepsykolog lagt inn her. Og det er lagt inn lønsmidlar til å opprette dagavdeling i Elvavegen. I tillegg kjem løns- og prisauke på 3,3% som også skal dekkast inn. Dette må bety at ramma for 2022 er langt, langt frå dekkande for å kunne oppretthalde dagens tenestenivå. Brukarutvalet er svært uroa for kva konsekvensar dette vil få for sjukeheimane.
- Kommunedirektøren har lagt inn eit nedtrekk på 3,4 mill. kroner. Brukarutvalet er fryktar at dette vil kunne ramme sjukeheimane, både m.o.t. bemanning, kvalitet og omsorg for bebuarane. Med det svake fokus som er på nettopp sjukheimane i budsjettdokumentet, meiner vi dette er ei berettiga frykt.

- I budsjettframlegget er m.a. nedlegging av 2 plassar ved Vaksdal sjukeheim eit aktuelt tiltak. Brukarutvalet går sterkt imot dette.

4. Rammer i planperioden

- Dei føreslåtte budsjetttrammene vidare i planperioden viser kraftige kutt: Ned til 123,5 mill. i 2023, 122,8 mill. i 2024 og 121,9 mill. i 2025. Brukarutvalet stiller seg heilt uforståande til realismen i desse rammene, og er skremt over kva negative konsekvensar dette vil kunne få for sjukeheimane og eldreomsorga i Vaksdal kommune.

- Det står ingenting i økonomiplanen om korleis ein skal kunne få dette til. Brukarutvalet meiner at kommunedirektøren burde gjere greie for kva tiltak han planlegg innan helse- og omsorg for å klare å halde slike budsjetttrammer i åra frametter, og undrast på om han tenkjer å stimulere dei eldste til å flytte til ein annan kommune?

5. Konklusjon

Brukarutvalet for sjukeheimane i Vaksdal kommune kan ikkje sjå at det er muleg å oppretthalde forsvarleg bemanning, tenestetilbod, kvalitet og omsorg på sjukeheimane med dette budsjettframlegget. Vi krev at kommunestyret syter for ei forsvarleg og realistisk budsjetttramme til dette tenesteområdet.

Gode sjukeheimstenester er eit grunnleggjande tiltak i eldreomsorga. Den er kanskje lite synleg for innbyggjarane – før dei sjølve blir pårørande eller brukarar. Og denne delen av eldreomsorga får etter Brukarutvalet sitt syn altfor lite merksemd i budsjettdokumentet.

Det er viktig med tiltak som gjer at eldre kan bu heime lengst muleg, men før eller seinare vil svært mange dei eldre få behov for sjukeheimsomsorg.